

Kommunit akornanni akileraartarnikkut naligiissaarinerup nutaap naatsorsuinikkut sunik tunngaveqarluni sunillu siunertaqarluni pisarnissaanik apeqquteqaat aallaavigalugu oqallinnissamut siunnersuut.

(Inuit Ataqtigiit Inatsisartuni gruppianni ilaasortat)

Akissuteqaat

(Aningaasaqarnermut Aatsitassanullu Naalackersuisoq)

Inuit Ataqtigiit Inatsisartuni gruppianni ilaasortat, kommunini naligiissarineq pillugu sammisaq Inatsisartuni oqallisigisassanngorlugu saqqummiukkassiuk qujanaq. Sammisaq kommunit akornanni Naalackersuisunullu naleqqiullugu oqallisigineqarsimaqaaq. Tamanna tunngavigalugu Naalackersuisut ullumikkut oqallittoqarnissaanut qilanaarput.

Naligiissaarinermut aaqqissuussinermi kommunit tamarmik aningaasaqarnikkut innuttaasunut assigiimmik pitsaanerumillu sullissisinaanissaat aallaavigalugu anguniarneqarpoq. Periusissiap nutaap aamma qulakkiissavaa kommunit atugarissaarnerup tungaatigut suliniarnertik pingaartinnerussagaat pissutsinik ingerlaavartumik pitsanngorsaaniarnerminni kajumissuseqarnerat, kommuninilu pissutsit sunniuteqarnerulersillugit, taakkununga ilaallutik naammassisaqarsinnaaneq ineriartortitsinerlu.

Siunissami naligiissaarinermut aaqqissuussineq aningaasartuutaasartut assigiinngissutaannut taartaassaaq - kisiannili najukkani aalajangiinernut oqaatigineqartunut assigiinngissutit pineqarnatik.

Naligiissarineq kommunit akornanni aaqqissuussineruvoq - taamaattorli kommunit naligiissaarinermut tunngatillugu tunngaviatigut assigiinngitsunik soqtigisaqarput. Nunarput tamakkerlugu pitsaanerpaamik aaqqiissuteqarnissaq Naalackersuisunut pingaaruteqarpoq, taamaaliornikkut innuttaasunut inuussutissarsiutinillu ingerlataqartunut ajunngitsunik atugassaqtitsinissaq qulakkeerneqarsinnaammat.

Naligiissaarinermut aaqqissuussineq nutaaq pingaarnertigut sapinngisamik pisariitsuusariaqarpoq, piviusorsioortumillu tunngavilersuutinik aallaaveqartariaqarluni. Aalajangersimasumik borgmesterit ukununnga isumaqataapput:

- *”Innuttaasunik sullissinissami kommunit assigiimmik periarfissaqarnissaat naligiissaarinikkut qulakkeerneqassaaq*
- *Sapinngisamik piviusorsioortumik tunngaveqarluni aallaaveqartariaqarpoq - matumani massakkut innuttaasut utoqqaliartortarnerannut ilusaannullu amerlanertigut paasissutissat tunngavilersukkat pigineqarput*

- *Periuserineqartussaq allatut immersorneqassappat paasisstissanut tunngavigineqartut ullumikkornit pitsaannerusut pissarsiarineqartariaqarput - tamannalu siusinnerpaamik pisinnaavoq 2016-imi*
- *Akilaraarutitut procentit assersuunneqarsinnaasut naligiissaarnerisa kingorna innuttaasut isertitaasa agguaqatigiissinnerat aallaavimmikkut assigiittussaapput, tamatumani kommunit ilaat aningaasartuuteqarnermikkut kommuninit allanit oqimaatsorsiornerat piviusorsiorlutik tunngavilersorneqarsinnaappat*
- *Naligiissaarinermit kommunit naammassisaqarsinnaanerisut imaluunniit inuussutissarsiutinik nutaanik pilersitsinissamat tunngaviliisut pillarneqassanngillat - tamanna naliginnginnaasumik isumaqarpoq naligiissaarinissap 100 %-imik pineqannginnera*
- *Periuseq qajannaatsoq paasiuunartorlu, tassanilu siunnersuutigineqarpoq kommuninit ataatsimut akilaraarut atorunnaassasoq"*

Aaqqissuussineq massakkut atorineqartoq attanneqarsinnaanngilaq. Aaqqissuussineq massakkut atorineqartoq aaqqiigallarnernik arlalinnik imaqarpoq paasiuunnaassinnaasartunik, paasisstissanullu tunngavinnik amigartunik killeqartunillu aallaaveqarluni. Taamaammat ingerlatiinnassallugu tulluurtuunngilaq.

Ataatsimoortumik tapiissutit naligiissaarinerullu agguataarnissaannut periuseq nutaaq eqqartorneqartillugu isiginiagassat pingaarutillit marluk maluginiartariaqarput:

- 1) Kommunit aaqqissuussinermit immikkut qanoq tapeeqataasassappat?
- 2) Kommunit aaqqissuussinermit immikkut qanoq pissarsisassappat?

Naligiissaarineq kommunit akornanni isertitaasut aningaasartuutaasullu assigiinngissutaannut taartaassaaq - kiffartuussinermit suqaluartunik tunniussinermit kommunini isertitat aningaasartuutillu ilusaanni assigiinngissutaannik pilersinneqarnikut. Tamanna najukkani aalajangersarneqartumik kiffartuussinermit imaluunniit iliuusissani amigaatigineqartuni assigiinngissutsinut taartaassanngilaq.

Ataatsimoortumik tapiissutit naligiissaarnissaannut agguannissaannullu periussamat nutaamut siunnersuutip suliarinissaanut aallartitat kommunineersut peqataassapput. Immikkoortut arlallit pillugit allaffissornikkut isumaqatigiittoqareerpoq. Sulili isumaqatigiittoqanngilaq innuttaasut namminersorlutik oqartussani, naalagaaffimmi imaluunniit ingerlatseqatigiiffinni namminersorlutik oqartussanit pigineqartuni sulisut akilaraarutaasigut isertitarineqartut ilumut tamakkiisumik ilaannakortumilluunniit naligiissaarneqassanersut. Kommunit pingasut kissaatigaat isertitat tamakku isertitaasuniit allanit annerusumik naligiissaarneqassasut, Kommuneqarfik Sermersuulli kissaatiginagu isertitat taakku isertitanit allanit annerusumik naligiissaarneqassasut. Kinaassusersiorneq tunngaviunngilaq periussisiap arlaat toqqarneqarpat."Namminersorlutik Oqartussanit akilaraarutitigut isertitat" taakku immikkut naligiissaarneqassanersut pillugit kissaateqartoqarnerisooq naalakkersuunikkut aalajangiiffigineqarnissaa pisariaqartinneqarpoq.

Naalackersuisut kommunillu politikikkut ataqatigiissaarisuisa sulinissamut suleriaasissaq pillugu pilersaarut akuersissutigisimavaat, tassanilu naligiissaarinnermut aaqqissuussineq suleriaasissami siullertut eqqartorneqartussaalluni - tassa akileraarutitigut isertitat ilaat qanoq annertutigisut ilanngunneqassappannersut, qanorlu naligiissaarinerit annertutigisut kommunit aningaasaqarnerannut attuumassuteqassannersut. Tamatuma kingorna naligiissaarineri agguataarinissamut uuttuutit aalajangersarneqassapput, uuttuutillu tamakku imminnut qanoq ataqatigiissanersut aalajangiiffigalugit. Suleriaasissaq agguataarinissami inuiaqatigiit agguataarnerannik pingaartitsisoq toqqarneqartussatut ilimagineqarpoq, kisiannili inuit ikiliartornerat atuarfeqarfiullu iluani ingerlatsinikkut annikitsutigut akornutaasartut agguataarinissami apeqqutaassapput. Massakkut aasaanerani naligiissaarinnermut aaqqissuussinerup nutaap inissinnissaa anguniagaavoq.

Naalackersuisut, kommunit Naatsorsueqqissaartarfillu paasissutissanut tunngavigineqartut pitsanngortinniarlugit sulissuteqarput. Susassaqarfiit ilaanni paasissutissanut tunngavigineqartut sivikitsumik pitsanngortinneqarsinnaapput, susassaqarfinilu allani sivilunerusumik piffissaqarnissaq/naatsorsuinerit nutaat pisariaqartinneqarlutik. Unamminartussaq annertoq tassaavoq paasissutissanut nalunaarsuinerit amigartut assigiinngitsulluunniit ilaatigut tunngavigineqartarmata. Paasissutissanut pitsaanerusumik tunngaviit naligiissaarinissamut aaqqissuussinnermut nutaamut pingaaruteqaannangillat, kisiannili aamma aalajangiinissamut tunngavinnut ataatsimut iluaqutaanerulersussaallutik. Naligiissaarinnermut aaqqissuussinerup paasissutissanut tunngavigineqartut sapinngisamik pitsaanerpaat aqutigalugit aallaaveqarnissaa anguniagaavoq. Suleqatigiissitaliap tamanna naalackersuinikkut isummernissamut tunngavissiami pingaaruteqartutut isigaa. Taamaammat paasissutissanut tunngavigineqartut pitsanngorneruppata aaqqissuussineq kingusinnerusukkut ilassallugu nalerisassallugulu pisariaqartinneqassagunarpoq.

Naalackersuisut kommunini tamani aningaasaqarnikkut peqqissuunissaq, patajaatsuunissaq kiisalu siuariarnissaq pingaaruteqartuummat isumaqatigisinnaavaat.